

Reykjavík, 5. nóvember 2018

Mennta- og menningarmálaráðuneyti
Sölvhólgata 4
150 Reykjavík

bt / Lilja Alfreðsdóttir, mennta- og menningarmálaráðherra

Efni: Umsögn um drög að stefnu í íþróttamálum

UMFÍ fagnar því að fram séu komin drög að nýrri stefnu í íþróttamálum. Það vekur athygli UMFÍ að tímalengd stefnunnar er talsvert lengri en fyrri stefnu. Það er jákvætt skref að láta stefnu ná yfir lengri tíma þar sem það er líklegra til að festa hana frekar í sessi og auka líkur á að unnið verði í samræmi við hana og markmiðum hennar náð.

UMFÍ telur þó mikilvægt að ábyrgðarskipting ákveðinna aðgerða sé skýr ásamt forgangsriðun og styttri tímamörkum einstakra verkþátta. Því er nauðsynlegt að í kjölfar stefnunnar verði komið á formlegu og skipulögðu samstarfi hagsmunaaðila til að leiða út ítarlegri aðgerðaáætlun sem mun auka verulega líkurnar á árangursríkri framkvæmd stefnunnar samfélaginu til góða.

Kröfur varðandi umgjörð og aðbúnað í íþrótt- og æskulýðsstarfi eru sífellt að aukast. Þær kröfur koma að hluta til frá hreyfingunni sjálfri. UMFÍ telur mikilvægt að hugað verði að því að setja ekki of þyngjandi kröfur á grasrótastarfið sem er byggt upp á framlagi sjálfbóðaliða þar sem aðstæður íþróttafélaga, íþróttahéraða og sérsambanda er gífurlega mismunandi. Mikilvægt er því að þeir þættir sem stjórnvöld leggja áherslu á að séu innleiddir í íþróttahreyfinguna, umfram það framlag sem er sjálfsprottið, sé stutt með aðföngum í formi starfsmanna, fjármagns eða annarra mögulegra verkfæra sem íþróttahreyfingin getur nýtt sér.


UMFÍ tekur heilshugar undir mikilvægi þess að allir aðilar taki mið af jafnréttissjónarmiðum í starfinu, að allir hafi jöfn tækifæri til að taka þátt í íþróttum og hverju öðru starfi sem heyrir undir stefnuna óháð kyni, kynhneigð, kynþætti auk fleiri þátta. Íþróttir eiga að vera fyrir alla og allir eiga því að geta haft aðgengi að íþróttum.

Innan UMFÍ eru 29 sambandsaðilar og rúmlega 340 íþróttafélög um allt land sem sinna fjölbreyttu íþrótt- og æskulýðsstarfi. UMFÍ telur að mikilvægt sé að endurspegla fjölbreytileikann í samfélaginu og hafa verkefnatengdar áherslur sem forgangsraðað er í sameiginlegri aðgerðaráætlun í takt við þarfir þjóðfélagsins hverju sinni. Með þeim hætti er hægt að efla samstarf á öllum stigum innan íþróttahreyfingarinnar og stuðla þannig að markvissari árangri íþróttastefnunnar.

Síðast en ekki síst fagnar UMFÍ áherslum stjórnvalda er varða eflingu íþróttahéraða og endurskipulagningu þeirra til að styðja enn frekar við minni starfseiningar sérstaklega á landsbyggðinni. Að mati UMFÍ er um að ræða nauðsynlegt mál sem brýnt er að ljúka.

Að þessu sögðu erum við hjá UMFÍ tilbúin til samtals við stjórnvöld um drög að stefnu í íþróttamálum landsins til framtíðar og leggja frekari vinnu við að gera hana vel úr garði og stuðla að framgangi hennar.

Virðingarfyllst,
f.h. Ungmennafélags Íslands



Auður Inga Þorsteinsdóttir,
Framkvæmdastjóri UMFÍ